

## NONGSANG ZODIA?

Itna in atawntung abeithe i lo lungnopna, tuiduh bangin duhin, dangtaak tawntunga, akisia theilo kizopna, ki mawhsakna omlo kitelsiamna, leh atawntung kipumkhatna lam manawh in hanciam tawntung hi. Itna ii kahna aw avengsak theiding mi i zonga, leitungah muhhak i sa mahmah hi. Itna in ama omna ding munzongin, amuhloh ciangin, khuva bangin thuumin, lawktaa bangin tau a, ahehnem zoding kuamah mulo hi. Itna anei mi in, a itmi zongin, amuhdongin lungkia lo hi. Tua hi-in, itna in a itmi adingin, natna haksatna, supna leh baaina te a thuak hangin lungkim tawntungin, ama neih itna in, gentheih nate tungah agualzosak vangliatna hongsuak hi. Itna in muh dahna te thuaktentan in, telkhialhna te sangsiamna, etkhialhna te muhsiam hi. Itna in a it mite adingin kiniamkhatna tawh na semin, kampau a, nungta tawntung ahih manin, etneuna, sim mawhna, kosiata leh pampaihna te thuakzelzel hi. Amah in nemngiingeei in om ahih manin, bangzahciang dongin tua itna thupi hiam cihthu itna neite bekmah in telzo in, thupisa hi.

Itna in a itnu a itpa' lungtangsung bekah khawlmunnuam zongin, amuh mateng tawlngalo in, zongtawntung hi. Ahi zongin atawntungin, munkhempeuh ah amah munkipia lo in, amah in konggei ah ngakin, kongkhak kiu tawntung hi. Cik ciang kong hong honding hiam ci-in, lametna tawh ngak tawn tunga, konggei ah dingden ahihman in, mite in amah ahai sa uhhi. Ahi zongin, konggei ah dingin, kong hong kiuden itna pen, kong hon in khawlmun nuam apia kha mite ahih leh etin lawmin, nunnuam damtui dawn uhhi. Itna in sihna sangin vang lianzaw a, zong thahatzaw hi. Sihna in itna susia zolo in, tua itna khau pen sattat zolo hi. Tua thu hangin, itna neite kisihipih in, itna nei taktakte in, a itmi te adingun anuntakna uh piakhia in, itna lakkhia uhhi. Hihthu hangin, itna in abeitheilo kizopna hongsuakin, tua kizopna in nuntakna tui ahihi. Hih nuntakna tui pen itna pan hongluang khia ahih manin, itna pen nuntakna tuinak ci-in, pahtawina kammal tawh i minvawh hi. Itna nei pa /nu in, a itnu/pa kiangah kanuntakna nang ading kongpia hi,

ci-in hangtakin kiciamngam hi (Kiteen na kamciampiakna). Itna in, a itnu a itpa adingin, anuntakna piakhia ngam ahih leh, tua itna in a itnu a itpa ading in nuntak na tui hongsuakta hi. Tua hi-in, hongit ing cina pi-in, nuntakna dingthu, nuntaknop na dingthu, nuntak khopna ding thute genlo, gello, ngaih sun lo, kamkumlo, semlo, bawlllo, kinlo in, ama aituambek a ngaih sun, ama duhbekne in dawnin, a ma utbek semin bawlin, ama utna pai-in vaka, ama utut in omlel leh tua in itna thuman thutak tawh kileh bulh ahih manin, kilemlohna, kisiat na, kitot kiselna, kikhenkhapna piangsak hi.

Tate ka it hi cina pi-in, tate sangsumding sangin, Khaini, Kunpawng cihte leiding akinzaw, zuhai tawiding amasak zaw, zatepding athupi sakzaw mitampi omthei hi. Mikhat in atanu sangsum ding, kha khat 1000 piakding piazolo in, atanu sang khawlsak hi. Ahizongin kalkhatin zu thawlnih ciang man man dawn a, zu thawlkhat ciang zanga (500 ) man ahih manin, kalkhat in 1000, manman in zangzo bilbel hi. Tua mi in, atanu ka it hi, kasihpih ngamhi, hongci leh kua in umngamding i hiam? Itna in nuntakna tui hi in, nuntak na apicingsakding nasepna, kidekna, kipiakkhiatna, kihuhna, ki makaihna, kiho siamna, kamkhum zatttheihna te khempeuh itna cih kammal sungah u nau te ahihi. Tua hi in, itna in kidekzawhna, itna in supngamna, itna in natngamna, itna in paingam ciahngamna, itna in annkuang uumkhawm ngamna, itna in hawmsiamna leh sih ngamna cih te hongpiak matengin, itna in eite lungtang sungah mun ngahlo ahihna thu hongphawksak hi. "Ken note kongit mahbangan, note khat leh khat na ki-it un" ci a, hong vaikhak Topa in, a itmi te adingin natna thuak hi, satna thuak hi, kosiata thuak hi, simmawhna thuak hi, gensiatna leh cilphilhna thuak hi, anunung ciangin thahna thuakhi. Ahi zong in itna in sihnasangin vanglianazaw a, sihna in itna zozo ngeilo ahih manin, itna nei Nazareth khuami Jesu in hansung pan hongthokik in, eite Honpa le Topa cihna za hongngah hi (cf Philipians 2:6-11). Pasian in ki-it na hi a (1Jn 4:8,16), itna aneite Topa sungah nungta dinghi.